

alle den de on seen edir horen lesen, dat de ghestrenghe knechte
 Bethman Syvert unde Hinrik brodere geheten von Hoym unde ore erven
 mit unsir fulbort und willen hebben vorsat vor elven Brandenbr. mark
 eyn blek holtes, geheten dat Czorsikdayl, ghelegen boven Rolevesburg,
 mit allir nut unde rechte also se dat von uns to leyne hebben, den 5
 bescheidenen luden Hanse Staken unde Woldelefe Wysinghe, borgeren
 to Quedlingeburg, oren eliken husfrowen und oren erven in disser
 wyse, also hir nu beschreven steyd, dat disse ernanten borgere und
 ore erven schullen disses ernomden blek holtes gebruken unde beneiten
 to vorn ses jare umme, unde denne in dem sesten jare dar na so 10
 moghen disse ernanten von Hoym edir ore erven dat blek holtes wedir
 losen mit elven Brandenbr. marken, dest se de losinghe den ernanten
 borgeren und oren erven vorkundighen und witlik don eyn verndel
 jares vor paschen unde denne de betalinghe don und leysten uppe de
 sulven paschen in der stad to Quedlingeburg mit al sulkeme ghelde, 15
 elven Brandenbr. marken, also vore beschreven steyd. Were aver dat
 de losinghe nicht enschege in dem sesten jare wenne de ses jar umme
 quemen, also disse bref utwiset, so scholden de vorgenanten borgere
 vordan des blek holtes gebruken und beneiten aver ses jar umme, also
 dat de vorgenante von Hoym de losinghe nicht schullen don, sundir 20
 in dem sesten jare. De wile dat de losinghe nicht enschut in dem
 sesten jare, so steid de vorsettinghe io vordan ses jar umme, er denne
 dat men dyt vorgenante blek holtes wedirlosen moghe. Des sulven
 glik moghen disse vorgenante borgere edir ore erven ore ghelt, elven
 Brandenbr. mark, wedireischen in dem sesten jare eyn verndel jares 25
 vore up to secghene, also vore beschreven steid, und willen des ore
 rechten were wesen, wur und wanne one des nod were und se dat
 von uns eischeden: dar enwille we noch neymant von unsir weghe
 se ane hinderen unde willen se dar wol by behalden unde laten an
 argelist. Des to orkunde dat disse vorschreven stugke von uns unde 30
 unsen nakomelinghen stede und ghancz gehalden werden dissen ernan-
 ten borgeren unde oren erven, so hebbe we ernante Borchard greve
 to Reynsten, greve Olrik sin veddere von unsir unde unsir erven
 weghe dissen bref dar up gheven besegilt mit unsis ernanten vedderen
 greven Borchard ingesegile, des we mit ome an dissem brefe gebu- 35
 ken, angehengit na goddis bort dritteynhundirt jar in dem vyf und
 achtentigisten jare des mandagis na sente Vincencius dage.

Orig. mit Siegel im Stadt-Archiv zu Quedlinburg No. 115.